

茶  
香  
室  
經  
說

余於學無所得四十年來鑽研經義所得亦極麤獷然  
生平譏述究以說經者爲多羣經平議外散見於第一  
樓叢書及曲園俞樓兩稊纂者益又不下數百條矣至  
茶香室叢鈔續鈔三鈔意在網羅舊聞逸事閒及經義  
不足言治經也惟自主講浙江詁經精舍已逾二十載  
評閱課卷及與門下士往復講論每有觸發隨筆記錄  
積久遂多去年夏右骸生瘍精力益衰故秋閒不至西  
湖於吳下寓廬閉門養疾遂將所記錄諸條又益以二  
百餘事編纂成書釐爲十六卷因此書之成適在茶香  
室三鈔成書之後故卽名之曰茶香室經說不知今之

所說其稍勝於前乎抑或精神不及曩時疏舛更甚也  
余說經諸書王益吾祭酒刻 皇清經解續編采輯幾  
及大半此書則成於續編既定之後不及補入將來有  
刻 皇清經解三編者安知不又從隗始乎 國朝經  
術昌明巨儒輩出余願以此書爲後來者前馬也光緒  
十有四年春二月曲園居士書

茶香室經說目錄

第一卷

周易 二十二條

尙書 二十八條

第二卷

毛詩上 二十七條

第三卷

毛詩中 二十七條

第四卷

毛詩下 二十七條

第五卷

周禮上 三十三條

第六卷

周禮下 三十四條

第七卷

儀禮上 二十八條

第八卷

儀禮下 二十五條

第九卷

禮記 三十四條

第十卷

禮記二 三十二條

第十一卷

禮記三 三十二條

第十二卷

禮記四 三十條

第十三卷

春秋公羊傳 二十四條

春秋穀梁傳 二十一條

第十四卷

左傳上 四十條

第十五卷

左傳下 三十九條

第十六卷

論語 十九條

孟子 十六條

爾雅 二十二條

茶香室經說卷一

德清俞樾

周易

乾坤六爻當十二月

易乾初九潛龍勿用正義曰言天地自然之氣起於建子之月陰氣始盛陽氣潛在地故言初九潛龍也愚按乾卦六爻各當一月此有二說並見李鼎祚周易集解干寶謂乾初九十一月九二十二月九三正月九四二月九五三月上九四月坤初六五月六二六月六三七月六四八月六五九月上六十月何妥謂乾初九十



一月九二正月

集解未引可以例推

九三三月九四五月九五七

月上九九月孔氏正義於九二爻下云諸儒以爲九二當太族之月陽氣發見則九三爲建辰之月九四爲建午之月九五爲建申之月爲陰氣始殺不宜稱飛龍在天上九爲建戌之月羣陰旣盛不得言與時偕極諸儒此說於理稍乖此乾之陽氣漸生宜據十一月之後至建巳之月此九二當據建丑建寅之間是孔氏從干寶不從何妥然爻之取象不必與月相準如必與月相準則陰生於午是爲五月坤初六不當言履霜也且從干寶說則陽盡陰生而已從何妥說則陽盡復生陽宜諸

儒皆從何說也但集解於坤卦不引何妥說未知其說如何若以陰生于午則坤初六五月六二七月六三九月六四十一月六五正月上六三月與乾爻同月而陰陽亂矣愚謂聖人扶陽抑陰陰雖生于午而退後一月初六六月六二八月六三十月六四十二月六五二月上六四月何氏之說必當如是可以補集解之所未備

### 否臧凶

師初六師出以律否臧凶王注曰失律而臧何異於否失律有功法所不赦故師出不以律否臧皆凶按如王注則當改經文爲師出不以律矣義不可通宣十二年

左傳知莊子引此爻辭杜注曰否不也訓否爲不必周易舊說下文有律以如已也故曰律否臧且律竭也阮氏校勘記曰補刊石經否作不此亦古義之幸存者此爻之義言師出必以律若其不臧則凶矣不臧者不如律也象傳曰師出以律失律凶也失律二字卽釋經文不臧二字王注誤以否臧爲對文致失其旨然亦因左傳順成爲臧逆爲否二句似乎否與臧對不知左氏之文猶云順成爲臧逆爲不臧下句省一臧字耳

### 素履

履初九素履往无咎王注曰履道惡華故素乃无咎愚

按周禮履人有素履鄭注曰素履非純吉有凶去飾者  
又曰祭祀而有素履散履者唯大祥時然則素履乃大  
祥後所著非此經所當取象也素讀爲係禮記中庸篇  
君子素其位而行不願乎其外素富貴行乎富貴素貧  
賤行乎貧賤素夷狄行乎夷狄素患難行乎患難君子  
無入而不自得焉鄭注曰素皆讀爲係正義曰素鄉也  
鄉其所居之位而行愚謂中庸所言正合此爻之義素  
履卽素位而行也君子素位而行無入而不自得故傳  
曰獨行願也獨行願卽無入而不自得也履卦六爻皆  
有履字然皆以人之履之者言不以履言若素履是履

之色豈九五夫履是履之制乎

歸妹以祉

泰九五帝乙歸妹以祉元吉王注曰女處尊位履中居順降身應二感以相與用中行願不失其禮帝乙歸妹誠合斯義履順居中行願以祉盡夫陰陽交配之宜故元吉也愚按王注辭繁而義晦不知所謂祉者王作何解正義以祉福說之恐非王旨也此經雖連帝乙爲文而歸妹以祉實與歸妹爻辭歸妹以娣歸妹以須一律傳云以祉元吉文不備耳不得因傳文而讀帝乙歸妹絕句也歸妹以祉若解作歸妹以福恐不成義釋文出

以祉二字云音恥此祉福之祉廣韵六旨有祉字敕里切福也祿也與恥字同音是其字也又云一音勑子反又音止此則廣韵未載疑卽讀爲止詩小旻篇國雖靡止箋云止禮也帝乙歸妹以祉者帝乙歸妹以禮也後漢書荀爽傳引此經而說云言湯以娶禮歸其妹於諸侯也是帝乙歸妹以禮乃古易說如此王注貌爲高古恥引舊說而云不失其禮又云盡夫陰陽交配之宜故元吉也則其訓祉字固不以爲祉福字矣否九四疇離祉王以疇離福釋之而此注不見福字王氏之意可知孔疏未得其意

八月有凶

臨彖辭至于八月有凶王注曰八月陽衰而陰長小人道長君子道消也故曰有凶正義曰臨爲建丑之月從建丑至七月建申之時三陰旣盛三陽方退小人道長君子道消故有凶也又引何氏云從建子陽生至建未爲八月褚氏云自建寅至建酉爲八月愚按何氏以周正言褚氏以夏正言二說皆有理蓋周易用周正固其所也而夏數得夫則言陰陽消長仍用夏正亦其所也從周正則八月爲天山遯與臨旁通二陽生者變爲二陰生故凶也從夏正則八月爲風地觀與臨反對二陽

在下四陰在上者變爲四陰在下一二陽在上矣故凶也  
至王氏虛言其理本不言爲何月正義謂是建申之月  
則以周正爲九月以夏正爲七月非八月也其卦爲天  
地否三陰三陽之卦與臨非旁通又非反對也可知其  
說之非矣正義又云陽長之卦每卦皆應八月有凶但  
此卦名臨是盛大之義故特戒之此亦不然惟臨之一  
卦八月有凶以周正言以夏正言均通餘卦不然復旁  
通之卦爲姤夏五月周七月也反對之卦爲剝夏九月  
周十一月也大壯旁通之卦爲觀夏八月周十月也反  
對之卦爲遯夏六月周八月也泰反對爲否旁通亦爲



否夏七月周九月也無夏正周正皆八者故八月有凶  
之文惟於臨卦言之可見聖經立言之精矣或謂彖辭  
文王所作周正未建何得以周正言不知周人建子乃  
幽之舊俗也說詳毛詩

賁亨小

賁彖辭賁亨小利有攸往王注曰柔來文剛居位得中  
是以亨剛上文柔不得中位不若柔來文剛故小利有  
攸往愚按此當以亨小絕句易彖辭言小亨者二卦旅  
也巽也言亨小者亦二卦賁也既濟也既濟亨小絕句  
明見釋文賁卦亨小絕句無見及者虞注亦以小利有

攸往連文不獨王注然矣愚謂此與旣濟正同虞云旣濟泰五之二小謂二也柔得中故亨小然則賁卦泰上之乾二小亦以二言柔得中故亨小旣濟然賁亦然矣自此經失其讀則亨小惟見於旣濟一卦遂有以舊讀爲非者余前作羣經平議亦以亨小爲不辭未見及此也

彖傳曰賁亨柔來而文剛故亨分剛上而文柔故小此分釋亨小二字也下云利有攸往天文也蓋利有攸往卽以柔來文剛剛上文柔言是卽剛柔交錯之象故曰天文也又曰文明以止人文也則以卦德言之也自亨

小失其讀彖傳亦以小利有攸往連讀而天文也三字遂孤懸無屬於是有議增剛柔交錯四字者矣至彖傳發端言賁亨不連小字此與旣濟傳同正義謂從省是也

### 七日來復

復彖辭七日來復王注曰陽氣始剝盡至來復時凡七日正義曰觀注之意亦用易緯六日七分之義剝卦陽氣之盡在於九月之末十月當純坤用事坤卦有六日七分坤卦之盡則復卦陽來是從剝盡至陽氣來復隔坤之一卦六日七分舉成數言故言凡七日也愚按以

此說復卦之七日來復洵得矣但震六二既濟六二並云勿逐七日得又隔何卦之六日七分乎今按易言七日實卽先甲後甲先庚後庚之義先甲三日辛也後甲三日丁也自辛至丁凡七日先庚三日丁也後庚三日癸也自丁至癸凡七日甲木克於辛金辛金厯七日爲丁火所克則甲木來復矣庚金克於丁火丁火厯七日爲癸水所克則庚金來復矣復卽得矣餘日皆然此七日來復七日得之義至爲明顯者也

君子用罔

大壯九三小人用壯君子用罔王注曰小人用之以爲

壯君子用之以爲羅己者也愚按王以罔爲羅罔此用  
舊說集解引虞曰離爲罔是也但經意實不如此易緯  
稽覽圖曰地上有陰而天上有陽曰應俱陰曰罔地上  
有陽而天上有陰曰應俱陽曰罔觀此可得此爻罔字  
之義猶曰小人用壯君子不用壯也傳曰小人用壯君  
子罔也與遯九四傳曰君子嘉遯小人否也一律罔卽  
否也否爲是否之否王彼注曰音臧否之否亦失其義  
論語人之生也直罔之生也幸而免以不直爲罔用此  
經文法也

舊井无禽

井初六舊井无禽王注曰久井不見渫治禽所不嚮而  
況人乎愚著羣經平義謂井水至深禽無從取飲故不  
從王說而從干寶水禽之義今審思之則王說是也古  
之聖人皆生於北方故觀象繫辭皆是北方之事南方  
水鄉隨處有水禽鳥隨處可飲自無取乎井若北方則  
往往平原千里無一勺之水非飲於井禽鳥皆渴死矣  
井水至深禽得飲之者北方有井之處必剡木爲槽以  
桔槔取水灌注其中以飲牛馬而禽亦集而飲焉余驅  
車燕趙之郊每於飲馬之處見無數飛鳥翔集其閒御  
者舉鞭一揮乃始散去王注所云井不渫治禽所不嚮

言一  
自得其實崔憬謂禽古擒字近儒高郵王氏又破井爲  
阱並非經旨

來兌

兌六三來兌凶王注曰以陰柔之質履非其位來求說  
者也非正而求說邪佞者也愚按經言來兌注增求字  
疑王氏所據本正作求兌注云履非其位求說者也本  
無來字集解引虞曰從大壯來失位故來兌凶是古本  
作來兌後人據以改王本遂於注中增入來字耳非正  
而求說句仍無來字王之本文也尙書呂刑篇惟貨惟  
來釋文云馬本作求此卽求來形似致誤之證

匪夷所思

渙六四渙有王匪夷所思王注曰處於卑順不可自專而爲散之任猶有王虛匪夷之慮愚按如王注以渙有王匪夷所思七字爲句殊不成義集解引虞注以匪夷所思四字爲句當從之此夷字卽豐九四遇其夷主之夷王注曰得初以發夷主吉也正義曰據初適四則以四爲主故曰遇其配主自四之初則以初爲主故曰遇其夷主二陽體敵兩主均平故初謂四爲句而四謂初爲夷今卽以說此卦夷亦謂初也初六六四二陰體敵故謂之夷初六居坎水之下六四則居互體艮中艮爲



山則有丘矣故匪夷所思也

順以聽命也

需象傳需于血順以聽也愚按經云需于血出白穴王注曰九三剛進四不能距見侵則辟順以聽命者也正義曰三來逼己趨不能距故出此所居之穴以避之但順以聽命而得免咎也故象曰需于血順以聽命也是王孔所據傳文聽下有命字

以配祖考

豫象傳雷出地奮豫先王以作樂崇德殷薦之上帝以配祖考正義曰以配祖考者謂以祖考配上帝愚按配

上帝而謂之配祖考慎矣且祖考之配上帝亦其功德  
自足以配之於作樂何與焉贅矣蓋薦之上帝是一事  
配祖考又是一事薦者以樂薦之配者亦是以樂配之  
无妄傳曰先王以茂對時釋文引馬曰對配也是對與  
配義通彼傳對字訓配此傳配字應訓對以配祖考者  
以對祖考也猶云對揚王休也作樂以象祖宗功德正  
所以對揚祖宗之休美故曰以配祖考配卽對也

### 居德則忌

夬象傳君子以施祿及下居德則忌王注曰夬者明法  
而決斷之象也忌止也法明斷嚴不可以慢故居德以

明禁也愚按如王注則其所據本當作居德明忌禮記  
禮運篇故百姓則君以自治也鄭注曰則當爲明此傳  
則字或亦明字之誤但集解引虞注曰乾爲德艮爲居  
故居德則忌是古本固作則耳

慎之至也

繫辭上傳初六藉用白茅无咎子曰苟錯之地可矣藉  
用白茅何咎之有慎之至也愚按大過象傳曰藉用白  
茅柔在下也並無慎意王彼注曰以柔處下過而可以  
无咎其唯慎乎蓋卽用此傳之義其實此傳所謂慎者  
非謹慎之謂詩巧言篇昊天已威予慎無罪昊天大憚

子慎無辜毛傳曰慎誠也此傳慎字亦當訓誠蓋有此誠意則雖錯之地亦可況有白茅以藉之乎若作謹慎解則與苟錯之地句不合矣下云慎斯術也以往釋文曰慎一本作順然則慎斯術也之慎當作順不作慎與此文初不相涉也

### 著龜

繫辭上傳莫大乎蓍龜愚按在易言易止宜言蓍乃兼言龜者固由便文足句實則易之理固通乎龜也下文云河出圖洛出書聖人則之正義引鄭注河龍圖發洛龜書咸是聖人畫卦本取法於龜文故卽灼龜以占吉

凶龜蓋從易而來也禮記祭義篇昔者聖人建陰陽天地之情立以爲易易抱龜南面天子卷冕北面注曰易官名是卜人亦謂之易也後世乃謂筮短龜長非篤論矣

君子見幾而作

繫辭下傳君子見幾而作不俟終日易曰介于石不終日貞吉愚按中論覈辨篇曰微子介於石不終日是此爻以微子言不知所本疑此傳君子見幾而作漢時相傳之本有作微子見幾而作者下文說復初九爻以顏子爲說則此以微子爲說亦無不可宜表出之以存古

義

履和而至

繫辭下傳履和而至韓注曰和而能至故可履也不釋至字之義愚按此傳舉九卦之德皆以相反見義困窮而通其尤顯者也履和而至亦必一律至當讀從毛詩關雎傳摯而有別之摯詩釋文曰摯本亦作鷖音至是鷖本字摯段字此作至者又以摯音至而卽通其字作至也尙書堯典正義引鄭注曰贊之言至所執以自至也此摯至聲近義通之證說文至部蠶讀若摯亦其例矣履之爲卦說而應乎乾所謂和也而上天下澤又秩

然不紊故曰履和而擊

至靜而德方

坤文言傳至靜而德方王注曰其德至靜德必方也正  
義曰地體不動是至靜生物不邪是德能方正愚按王  
注順文爲說不詳何義正義以方正釋方字則非也方  
當讀爲旁尙書堯典其土方鳩僝功史記五帝紀作旁  
皋陶謨方施象刑惟明新序節士篇作旁是方與旁古  
字通說文土部旁溥也至靜而德旁言其體至靜而其  
德則至溥也旁與滂義亦相近說文水部滂沛也德旁  
猶德滂矣

# 駁馬

說卦傳乾爲駁馬正義引王虞注曰駁馬能食虎豹取其至健然此馬世不恆有非乾所當取象集解本作駁引宋衷曰天有五行之色故爲駁馬然爾雅釋畜曰駟白駁則亦非具五色者世固無五色之馬也愚疑此文既有駁駁之異或傳寫有誤當作駁馬玉篇馬部駁音父牡馬也或古周易有作駁馬者故顧野王錄其字乎乾爲駁馬與坤爲子母牛正相配阮校勘記云石經駁字係磨改初刻當是駁字愚謂初刻安知非駁字乎

爲弓輪



說卦傳坎爲弓輪正義曰弓者激矢取如水激射也輪者運行如水行也愚按弓與輪二者非同類之物當云爲弓爲輪何以合而言之曰爲弓輪乎此弓疑非弓矢之弓謂車上之蓋弓也考工記輪人云弓長五尺謂之庇輪又輞人云輪輻三十以象日月也蓋弓二十有八以象星也弓輪同類故合言之曰爲弓輪

大壯則止

雜卦傳大壯則止韓注曰大正則小人止愚按易爲君子謀不爲小人謀何得從小人取義其說非也集解引虞曰大壯止陽陽故止然四陽方盛二陰何能止之其

說亦非也大壯所以爲止者蓋壯自有止義爾雅釋言疾齊壯也疾爲一義齊爲一義疾者疾速齊者整齊四陽盛長名之曰大壯取整齊之義非取疾速之義尙書牧誓曰不愆于六步七步乃止齊焉不愆于四伐五伐六伐七伐乃止齊焉是齊有止義也故曰大壯則止治國者先立其紀綱行軍者務嚴其紀律大壯之義也

### 尙書

#### 寅賓出日

尙書堯典寅賓出日枚傳曰寅敬賓導愚按史記五帝紀作敬道日出下文寅饒納日史記作敬道日入是寅

之訓敬固古文家舊義矣然竊謂非也使寅卽訓敬則上文敬授人時何不曰寅授人時乎下文敬致何不曰寅致乎今按月令正義引律厯志云引達於寅寅引也此經寅字當訓引不當訓敬寅賓出日謂日出時引而導之也寅餞納日謂日入時引而導之也枚傳曰餞送也日出言導日入言送因事之宜此固通論實則餞亦導也爾雅釋詁曰餞進也進卽有導引之義故史公不別其爲賓爲餞而皆以道字易之也

師錫帝曰

堯典師錫帝曰枚傳訓師爲眾按下文兪曰伯禹作司

空僉曰垂哉僉曰益哉此不稱僉而稱師非書例也正  
義引鄭注以師爲諸侯之師此說得之皋陶謨篇州十  
有二師鄭注州立十二人爲諸侯師蓋百國一師州十  
有二師則州千二百國也鄭解堯典師字卽用此義正  
義非之曰帝咨四岳徧訪羣臣安得諸侯之師獨對也  
此說未達當時情事夫古史簡略語焉不詳堯以天下  
與人何等大事必非一堂之上一時之頃一言而決者  
明明揚側陋此一語非徒口說而已必且通行天下周  
咨博訪如今 朝廷有大政事命督撫會議者然於是  
每一州由十二師下行千二百國千二百國詢謀僉同

上之十二師乃由十二師而達於朝廷是謂師錫下文  
帝曰俞予聞此猶漢制所謂報聞也又曰如何此又命  
大臣集議也於是四岳又極稱舜以贊成之而禪議定  
矣古史數語中包無限情事偽傳不足知之又不知俞  
予聞三字乃報聞於外諸侯之師者解爲我亦聞之遂  
有眾臣知舜聖賢恥己不若不獲已而言之真以小人  
度君子矣

或疑舜在側微天下萬國安能盡知之而皆舉舜乎不  
知此特以明聖人公天下之盛心且亦當時行大政之  
通例其實萬國諸侯未必人人與議而每州十二師除

圻內得九十六人亦未必一無異議但從其多者而已  
九十六人中雖有數人異議不害其爲師錫也韓非子  
曰堯欲傳天下於舜鯀諫曰不祥哉孰以天下而傳之  
匹夫乎其工又諫曰孰以天下而傳之匹夫乎此卽當  
時諸侯之異議者使堯不周咨博訪此等語言何自而  
來也周禮小司寇所謂詢立君者卽其遺意但堯時普  
詢萬國周則止詢萬民耳

賓于四門

堯典賓于四門四門穆穆枚傳曰四方諸侯來朝者舜  
賓迎之皆有美德無凶人正義曰鄭以賓爲擯謂舜爲

上擯孔不爲擯者謂舜旣錄攝事無不統以諸侯爲賓  
舜主其禮迎而待之非謂身爲擯也愚按鄭說固非而  
其文在納于大麓之前則猶未錄攝孔疏說亦非也大  
傳云天子太子年十八曰孟侯孟侯者於四方諸侯來  
朝迎於郊者問其所不知也問之人民之好惡地上所  
生美珍怪異山川之所有無父在時皆知之愚謂堯使  
舜賓于四門正用此禮蓋堯欲傳天下於舜則於舜無  
父子之名而有父子之實公羊傳所謂爲人後者爲之  
子也故使賓迎四方諸侯不獨使之練習天下之事而  
禪位之意亦曉然明示天下矣

肇十有二州

堯典肇十有二州姚方輿傳曰肇始也禹治水之後舜分冀州爲幽州并州分青州爲營州始置十二州愚按爾雅釋文引鄭說亦同非臆造也然此事竊有所疑治水之後九州大定何必紛更舊制創立新州如因地勢遼闊不得不然此必禹治水歸言於帝舜而其制之乃禹登王位仍復九州此何爲也夫自黃帝受命風后受圖割地而布九州其爲九州舊矣唐虞三代無不仍之非有改易其肇十有二州者爲立十二牧張本也白虎通封公侯篇曰唐虞謂之牧者何尙質使大夫往來牧



視故謂之牧旁立三人凡十二人尙書曰咨十有二牧  
按旁立三人謂每方立三人也洪水旣平而教養之政  
日益繁多天下諸侯散處九州之內不可無統攝之者  
於是東西南北四方各使大夫三人爲之牧每方三人  
則十二人矣分九州之地爲十二使各有專治其實於  
各州界域無所更移不過命之曰某州之牧而已以大  
判言之仍曰九州以州牧言之則爲十二州二者固不  
相妨禹登王位未必不循十二牧之制然海內之地則  
仍九州而已是以爾雅及職方氏所載九州名各不同  
正以天下止此九州而自舜以來冀州則有幽并之名

青州則有營州之名紀載之辭隨便言之二者同而異  
無庸屑屑分別也

宣三年左傳昔夏之方有德也貢金九牧是夏之牧九  
人而已蓋帝舜在位既久天下益治無復多事禹承其  
後改每方三人爲每州一人不過裁汰三牧於天下疆  
域無所移易十二牧九牧總此九州也不然舜與禹何  
爲如此紛更哉

### 食哉

堯典咨十有二牧曰食哉惟時姚方興傳曰咨亦謀也  
所重在於民食惟當敬授民時愚按民食固所重然此

文上無所承以食哉二字發端若從姚義殊爲鶻突殆非然也竊謂食哉二字爲句惟時者惟是也屬下讀蓋咨十有二牧以下至蠻夷率服皆史臣紀載語非舜語也咨十有二牧曰食哉八字一句食哉當是古語孫氏星衍古今文注疏正以食哉二字爲句以方言食勸也說之食之訓勸未知何義疑古人勸勉之辭蓋強飲強食之意也孫氏以說此經未知是否其讀則當從之惟時柔遠能邇愷德允元而難任人蠻夷率服此史臣於舜格文祖之日綜括舜一生大略而言之若是舜自言則蠻夷率服語涉誇張非舜所宜出矣又下文舜曰咨

傳曰言舜曰以別堯可知自舜曰以前史臣不載舜語使食哉惟時至蠻夷率服皆舜之言則舜曰二字宜移於此不然至下文方山舜曰二字以別於堯此數語不成爲堯語乎知此數語皆史臣之語則宜截食哉二字屬上惟時二字屬下方合紀事文法不當如今讀也

#### 四載

皋陶謨予乘四載枚傳曰所載者四謂水乘舟陸乘車泥乘輜山乘櫟愚按輜櫟異文異義甚多段氏撰異詳矣可無說也然余竊有疑者載卽乘也如傳義則予乘四載亦可作子載四乘矣且不詳其名物而但曰四載

何以示後世古文家說恐不如是史記夏本紀云陸行  
乘車水行乘船泥行乘橐山行乘橦左準繩右規矩載  
四時以開九州通九道陂九澤度九山是史公雖有乘  
車乘船乘橐乘橦之文而不以爲卽尙書之四載然  
四載則以爲載四時於乘橦之下有左準繩右規矩二  
句以間隔之則四載非車船橐橦四者明矣史記集解  
載四時句下引王肅曰所以行不違四時之宜也是可  
得載四時之義漢書魏相傳曰東方之神大昊乘震執  
規司春南方之神炎帝乘離執衡司夏西方之神少昊  
乘兌執矩司秋北方之神顓頊乘坎執權司冬中央之

神黃帝乘坤艮執繩司下土茲五帝所司各有時也東方之卦不可以治西方南方之卦不可以治北方春興兌治則飢秋興震治則華冬興離治則泄夏興坎治則雹明王謹于尊天慎于養人故立羲和之官以乘四時節授民事愚謂魏相之說必有所本蓋卽禹乘四載之古法乘震乘離乘兌乘坎卽所乘之四載也小爾雅廣詁載行也乘四載者乘四時之行也禹之治水行其所無事不以東方之卦治西方不以南方之卦治北方所謂順也不以春興兌治不以秋興震治亦所謂順也蓋自堯設羲和之官此理備矣鯀不得其道故彝倫攸斁

禹得其道故舜倫攸敘區區以舟車輶櫟爲言小矣史公於載四時之上有左準繩右規矩六字蓋亦相傳之古說規者乘震而司春者也矩者乘兌而司秋者也準繩者乘坤艮而司中央土者也言準繩不言權衡於四時之行不備史公屬文有詳有略也

丕應侯志

皋陶謨惟動丕應侯志枚傳曰侯待也動則天下大應之順命以待帝志愚按枚義迂曲殆非也此志字當以民言不以帝言此侯字卽侯我后之侯蓋民各有心不能自達於上而實環而待命於下惟動之得其道則能

大應天下後望之志故曰惟動不應後志猶云以對于天下也

冀州既載

禹貢冀州既載枚傳曰堯所都也先施貢賦役載於書釋文曰載載於書也馬同鄭韋昭云載事也愚舊作羣經平議從今讀以既載二字屬下但馬鄭皆以既載二字屬上古讀如此未可輕改而馬鄭所說既載之義似皆未得枚傳則更有誤字當云堯所都也先施功句賦役載於書今作先施貢非枚之舊矣至既載之義當別爲之說竊謂當時水患莫大於河禹治河至今稱神者



不在乎積石以東而在乎大陸以北按史記河渠書曰  
河舊衍溢害中國也尤甚故道河自積石厯龍門南到  
華陰東下砥柱及孟津雒汭至于大邳於是禹以爲河  
所從來者高水湍悍難以行平地數爲敗乃廝二渠以  
引其河北載之高地過降水至于大陸播爲九河同爲  
逆河入于勃海此禹治水之至計亦保衛帝都之勝算  
冀州在中而河自西之雍州至南之豫州又北行之東  
之兗州三面皆大河所環抱大河治而冀州安矣故冀  
州不言治河而發端曰旣載載者卽所謂載之高地也  
又於其末云恆衛旣從大陸旣作正義曰冀州田賦之

下始言恆衛旣從史以大略爲文不爲例也夫古史之  
文先後詳略皆有義例豈苟焉而爲之哉其係之於末  
者正與發端旣載相應皆爲治河紀也蓋所謂載之高  
地者其功正從大陸始故退大陸之文於田賦之下使  
與濟河惟兗州九河旣道相承接也河不經冀州故冀  
州無治河之文而治河實所以保衛冀州故始曰旣載  
末曰大陸旣作大陸旣作卽是冀州旣載說經者不達  
此義而旣載之義不可解矣

又按以禹貢形勢言之北條之水河爲大南條之水江  
爲大冀州之域大河環之荊州之域大江環之是故冀

州爲帝王之都而荊州自古強於天下所謂有王者後服無王者先叛亦其地勢然也春秋之世晉楚爲兩大國晉依河爲國楚依江爲國也戰國之世晉衰而秦繼之楚則仍稱大國形勢之說豈不信哉使禹不引河北行則地勢固北高南下河必直走徐揚矣安能環抱冀州而收旣載之功哉

孟子曰禹之治水順水之性此亦不盡然可順者順之不可順者不順也河自大伾以下使順其性則直走徐揚而已東南卑下揚土塗泥聽其所之將不可制禹於是從大陸導之北行載之高地北方土厚水深土性旣

堅隄岸又峻河力雖猛不能不由地中行可使數百年中不憂河患然能載之高地者亦惟開濬使極深而已河但知就下而不知已載而之高此禹所以爲神也嘗譬之河猶驕子也若更縱之無所不至矣必約束之使在嚴師畏友之側庶可就我範圍禹之治水猶是也余讀禹貢因表出之告萬世治河者

### 淮夷

禹貢淮夷蠙珠暨魚枚傳曰淮夷二水釋文曰淮夷鄭云淮水之夷民也馬云淮夷二水名孔傳云淮夷之水本亦有作淮夷二水也是釋文所據僞孔傳作淮夷之

水不言二水史記索隱曰按尚書云徂茲淮夷徐戎並  
興今徐州言淮夷則鄭解爲得愚按淮夷之名見於詩  
書其名甚著而馬獨以二水釋之夷之爲水不見於經  
傳宜後人之不從馬而從鄭也枚傳不欲同鄭又不敢  
從馬乃渾其辭曰淮夷之水今作二水非枚意矣然則  
馬氏以爲二水何歟水經沔水注曰夷水卽蠻水也又  
夷水注曰夷水卽岷山清江也蜀人見其澄清因名清  
江或卽以說此經之夷然夷水在蜀當屬梁益非徐州  
也竊謂夷卽泗也說文水部洩鼻液也從水夷聲禮記  
檀弓篇垂涕洟釋文曰洟音夷自目曰涕自鼻曰洟詩

澤陂篇涕泗滂沱毛傳曰自目曰涕自鼻曰泗然則泗可通作洩矣泗可通作洩故夷亦可通作泗上云泗濱浮磬是專出於泗者也此云淮泗蠙珠暨魚則出於泗又出於淮者也上句作泗用正字此句作夷用段字古書往往如此說詳古書疑義舉例

又按馬氏不以淮夷爲夷名蓋亦有說禹貢所書如島夷皮服島夷卉服蓋言水患平而得復其皮服卉服之舊枚說是也鄭謂島夷卉服是貢其服非也其他如蜎夷旣略萊夷作牧和夷底績皆於貢賦無涉故此文淮夷蠙珠暨魚是淮水夷水所出而非貢自淮水之夷也

聖人之於夷但使之各安其生而不責其貢此聖人所以治夷也

### 錫貢

禹貢厥包橘柚錫貢枚傳曰小曰橘大曰柚錫命乃貢言不常正義引鄭曰此州有錫而貢之或時無則不貢錫所以柔金也愚按橘柚微物何必錫命乃貢枚義非也九江納錫大龜史記夏本紀作入賜而此與豫州之錫貢均作錫不作賜可知古文家舊說固不以錫貢之錫爲納錫之錫矣近人治尚書者孫氏江氏於揚州均用鄭注而於豫州仍用錫命之說何其說之不定也夫

同此錫貢二字同在禹貢一篇之內在古史必無異義  
在鄭注必無異說以鄭爲不可從則已耳安得從之於  
揚州而不從之於豫州哉然鄭於錫字得之矣於貢字  
似猶未得愚謂貢當作項項乃瀕之段字說文水部瀕  
丹砂所化爲水銀也從水項聲尙書以項爲瀕者古文  
以聲爲主猶哥作歌馭作賢也今作貢者禹貢多貢字  
而項字止此兩見故誤改爲貢也錫瀕同類之物故皆  
以入貢淮南子地形篇曰黃埃五百歲生黃瀕黃瀕五  
百歲生黃金青曾八百歲生青瀕青瀕八百歲生青金  
赤丹七百歲生赤瀕赤瀕七百歲生赤金白磬九百歲



生白頌白頌九百歲生白金元砥六百歲生元頌元頌  
六百歲生元金是頌亦備五色其類至繁其用亦廣固  
工師之所需也

其發有逸口

盤庚上篇相時憺民猶胥顧于箴言其發有逸口枚傳  
曰言憺利小民尙相顧于箴誨恐其發動有過口之患  
愚按如傳義則其字上必加恐字於文方明未免增字  
釋經矣其疑當作替說文言部誓忌也從言其聲周書  
曰上不替于凶德今多方篇作爾尙不忌于凶德是誓  
忌聲義俱同可以通用廣雅釋詁忌恐也然則誓亦有

恐義發有逸口者恐發有逸口也作其者文之省耳  
枚傳得其義未得其字也

先王不懷

盤庚中篇殷降大虐先王不懷枚傳曰我殷家於天降  
大災則先王不思故居而行徙愚按訓懷爲思必加故  
居二字始成文義非塙詁也詩雄雉篇我之懷矣揚之  
水篇懷哉懷哉鄭箋並曰懷安也論語里仁篇君子懷  
德公冶長篇少者懷之孔注並曰懷安也此經懷字亦  
當訓安言殷降大虐先王不安卽上篇所云先王有服  
恪謹天命茲猶不常甯也

文侯之命篇肆先祖懷在位枚傳曰故我後世先祖歸在王位正義曰懷歸也歸在王位者王位是其所有也若歸向家然故稱歸也愚按傳疏均迂曲此懷字亦當訓安懷在位者安在位也簡而明矣

生生

盤庚中篇汝萬民乃不生生又曰往哉生生下篇敢其生生又曰生生自庸言生生者凡四枚傳皆訓進進孔疏以爲物之生長則必漸進故以生生爲進進愚謂說文生進也生本訓進經文疊言生生故傳文疊言進進此訓詁之恆例耳惟進進二字甚爲不辭於經典亦別

無所見疑生生當爲牲牲說文生部牲眾生並立之見  
從二生詩曰牲牲其鹿按桑柔篇牲牲其鹿毛傳曰牲  
牲眾多也正義謂是同心願樂之意與牲牲義合作生  
生者字之省耳必云進進轉失之矣

西伯戡黎微子

西伯戡黎微子二篇今在商書而說文女部嫠篆下引  
周書曰大命不孥卽西伯戡黎篇大命不孥也口部哻  
篆下引周書曰哻其耆長卽微子篇哻其耆長也彡部  
引周書曰我興受其退卽微子篇我興受其敗也是許  
君以此二篇爲周書若謂字誤安有三處皆誤者哉惟

足部躋篆下引商書曰予顛躋卽微子篇予顛躋然三處作周書一處作商書校讐古書必從其多者當據三處改此一處不當據一處改彼三處也然則此二篇何以爲周書曰是有帝告五篇之例書序允征之下有帝告釐沃湯征汝鳩汝方五篇釋文曰此五亡篇舊解是夏書馬鄭之徒以爲商書兩義並通夫帝告以下五篇皆商書而今列之夏書者以作書之時猶在夏時而未至商代也然則西伯戡黎微子二篇雖是商書而文王受命作周改元稱王依鄭君說入戊午部三十年歲在己未爲文王元年則自己未以後在周人言之己爲周

代矣此二篇作於周時卽爲周書疑古文家舊說有如此故許君從之此治古文尙書者所未知也

司徒

洪範四曰司空五曰司徒枚傳於司空曰主空土以居民於司徒曰主徒眾教以禮義愚按司空當爲司工工者事也故司空爲事官說已具羣經平議矣至司徒爲主徒眾亦不可通周禮所謂徒者府史胥徒也豈司徒所主乎司空當爲司工司徒疑當爲司土徒從彡土聲猶空從穴工聲段徒爲土猶段空爲工矣司土故爲地官其證一大司徒職首云掌建邦之土地之圖又云

以天下土地之圖周知地域廣輪之數辨其山林川澤  
丘陵原野之名物又云以土會之灋辨五地之物生又  
云以土宜之灋辨十有二土之名物以相民宅而知其  
利害以阜人民以蕃鳥獸以毓草木以任土事又云辨  
十有二壤之物而知其種以教稼穡樹藝又云以土均  
之灋辨五物九等制天下之地征又云以土圭之灋測  
土深正日景以求地中諸所言皆土地之事非司土而  
何其證二也所屬有土均土訓而山虞澤虞川衡林衡  
皆屬焉非司土而何其證三也春官之屬有鷄人賈疏  
云鷄屬木故列職於此夏官之屬有羊人疏云羊屬南

方火故在此秋官之屬有犬人疏云犬是金畜故連類  
在此而司徒所屬有牛人焉牛爲土畜疏雖不言可以  
例推牛人屬司徒則司徒爲司土明矣其證五也古者  
司徒實掌邦土其掌邦教也以掌邦土而及之大司徒  
職旣云以土會之灋辨五地之物生又云因此五物者  
民之常而施十有二教焉是其掌邦教正以其掌邦土  
也僞古文乃云司空掌邦土侵其官矣

穆卜

金縢篇二公曰我其爲王穆卜周公曰未可以戚我先  
王枚傳曰穆敬戚近也召公太公言王疾當敬卜吉凶



周公言未可以死近我先王相順之辭愚按二公欲卜而周公言未可其非相順顯而易見蔡傳謂未可以武王之疾憂惱先王蓋卻二公之卜自較枚傳爲得旨矣但如其說則下文植璧秉圭以告太王王季文王先王其不憂乎以此卻二公而公所爲又甚之無乃不可歟愚謂說此經者未解穆卜二字穆乃昭穆之穆僖二十四年左傳邾晉應韓武之穆也正義曰自后稷以後一昭一穆文王於次爲穆故文子爲昭武子爲穆二公欲爲王穆卜者蓋以武王疾已不可爲諱欲卜立後也毛詩斯干篇正義云書傳說成王之幼云在襁褓則克商

二年成王生否未可知天下甫定太子未生而王疾不可爲則二公之爲此謀亦當時之急務也且其時亦未必有倫序相當可爲武王後者二公殆必援殷家兄終弟及之例屬意周公矣故周公拒之曰未可以戚我先王乃禱於三王請以身代此正力拒二公爲王穆卜之意也下文王執書以泣曰其勿穆卜案上文但言開金滕之書正義曰開金滕之書案省故事求變異所由未嘗言王欲卜也何以云其勿穆卜乎漢書梅福傳注引尙書大傳王與大夫開金滕之書執書以泣曰周公勤勞王家于幼人弗及知無其勿穆卜之語史記魯史家

云成王執書以泣曰自今後其無繆卜乎此語更不可  
通開金縢得周公書與卜何干乃并戒後世勿繆卜乎  
愚謂其勿繆卜一語卽周公未可以戚我先王一語也  
在周公當日委婉言之則曰未可以戚我先王在成王  
此時徑遂其辭則直道周公之意曰其勿繆卜而已夫  
自金縢既發成王與二公徧問諸史與百執事當日情  
事已備知之矣成王不歎美其請以身代之事而獨於  
此一語且泣且言者蓋公將不利于孺子之言入在成  
王意中至此乃知當時二公固屬意周公而周公尙謝  
而勿受豈有武王崩後成王旣立而反包藏禍心窺伺

神器謀爲不利者乎成王曉然於周公無利天下之  
實在於此故感動於心卽出之於口而史臣亦卽載之  
於書雖史遷不能得其微意千載以下所當以意逆志  
也

### 甯武

大誥以于敕甯武圖功枚傳曰用撫安武事謀立其功  
愚按枚訓敕甯武爲撫安武似爲不辭甯者甯王也上  
文甯王遣我大寶龜傳曰安天下之王謂文王也下文  
不可不成乃甯考圖功傳曰不可不成汝甯祖聖考文  
武所謀之功正義曰經言甯卽文王然則此言甯武猶

言文武耳蓋文王有甯王之稱故言文王武王可也言甯王武王亦可也言文武可也言甯武亦可也以于校甯武圖功言往撫循文王武王所圖之功也何以明之下言甯考圖功則知此圖功上之甯字亦甯王也下言救甯王大命則知此以于救下之甯字亦甯王也但彼專言甯此則兼言武耳世人多聞文武罕聞甯武故失其解

又按下文不可不成乃甯考圖功傳以爲甯祖聖考經言甯不言聖言考不言祖甯祖聖考而合稱爲甯考太不辭矣傳者蓋以文王乃成王之祖不當稱考耳愚按

禮記祭法篇王立七廟曰考廟曰王考廟曰皇考廟曰顯考廟曰祖考廟然則祖亦未始不可稱考何疑乎甯考之稱乎蔡傳泥甯考之文從蘇氏說以甯王爲文王不知甯武圖功固文武並言甯王非武王可以此決之古人之辭往往對文則別散文則通對文則祖與考有別洛誥云承保乃文祖受命民越乃光烈考武王是也散文則祖亦考也此篇不可不成乃甯考圖功是也

### 乃疾厥子

康誥子弗祗服厥父事大傷厥考心于父不能字厥子乃疾厥子枚傳曰於爲人父不能字愛其子乃疾惡其

子是不慈愚按此經之旨不能無疑夫父之疾惡其子雖曰不慈然較子之弗祇服厥父事其輕重相縣不可以數計矣下文曰乃其速由文王作罰刑茲無赦然則父之疾惡其子與子之弗祇服厥父事同在不赦之條此豈以孝治天下之意哉疑所謂疾厥子者非止惡而已後漢書傅毅傳注曰疾害也此經疾字亦當訓害疾與嫉通廣雅釋詁嫉殺賊也嫉殺同訓其義卽相近不能字厥子乃疾厥子謂不能字之乃賊害之也以父母而賊害其子是亦泯亂民彝之大者故刑茲無赦也今律祖父母父母故殺子孫杖七十徒一年半卽此經之

義矣

又按下文于弟弗念天顯乃弗克恭厥兄兄亦不念鞠  
子哀大不友于弟弟止曰弗克恭兄則曰大不友蓋兄  
非大不友不與弟之弗克恭者同罰也以兄例父則所  
謂疾厥子者必不止於疾惡矣

殷庶殷

召誥越七日甲子周公乃朝用書命庶殷侯甸男邦伯  
厥旣命庶殷庶殷丕作愚按厥旣命庶殷庶承上周公乃  
朝用書命庶殷而言當作厥旣命庶殷下云庶殷丕作  
當作庶殷丕作蓋庶殷庶殷有別庶殷者指侯甸男衛



邦伯而言殷庶者殷之眾卽侯甸男衛之民也蓋周公所命者其君也不作者其民也下文云誥告庶殷傳謂是眾殷諸侯此庶殷當與義同周公所命必不能普及其民則命庶殷而非命殷庶可決矣

### 烝祭歲

洛誥戊辰王在新邑烝祭歲文王騂牛一武王騂牛一枚傳曰成王既受周公誥遂就居洛邑以十二月戊辰晦到明月夏之仲冬始於新邑烝祭故曰烝祭歲愚按枚義非也王果以戊辰到洛則當如召誥所云戊申大保朝至于洛乙卯周公朝至于洛之例書曰戊辰王至

于新邑不當云王在新邑也云王在新邑則到新邑在  
戊辰之前可知矣枚以爲戊辰始到明月乃烝祭然則  
此祭也在夏爲仲冬在周爲正月矣下文何以云王命  
周公後作冊逸誥在十有一月乎且烝祭歲三字爲句  
文亦未安釋文云王在新邑馬孔絕句鄭讀王在新邑  
烝正義曰鄭以烝祭上屬歲文王駢牛一者歲是成王  
元年正月朔日特告文武封周公也是此句鄭讀陸孔  
所言各異未知誰是卽從鄭義謂歲是成王元年正月  
朔日亦嫌於下文在十有二月不合愚謂烝字從釋文  
絕句祭歲二字自爲句祭歲者祭之名也何謂祭歲國

諸楚語曰古者先王日祭月享時類歲祀是古有歲祀之禮祭歲卽歲祀也韋注曰日祭於祖考月薦於曾高時類及二祧歲祀於壇墠周語日祭月祀時享歲貢韋注亦同所謂歲祀於壇墠者當作歲祀及壇墠與時類及二祧一例蓋日祭及祖考而止月薦及曾高而止時類則自二祧以下皆祭歲祀則自壇墠以下皆祭經傳但言時祭而歲祀無聞然在月令具有其文月令季冬之月命四監收秩薪柴以共郊廟及百祀之薪燎又云乃命大史次諸侯之列賦之犧牲以其皇天上帝社稷之饗又云命同姓之邦共寢廟之芻豢又云命宰厯卿

大夫至于庶民土田之數而賦犧牲以其山林名川之祀又云凡在天下九州之民者無不咸獻其力以其皇天上帝社稷寢廟山林名川之祀是古者歲終大祭上及皇天下及川林不止宗廟而已鄭君不知古有此禮故注月令但順文說之不敢質言爲何祭矣此經王在新邑烝是時祭也至歲終舉行祭歲之禮乃於文王武王加騂牛各一告封周公之後故曰祭歲文王騂牛一武王騂牛一

厥兆天子爵

無逸篇周公曰嗚呼厥亦惟我周段氏撰異曰尙書大

傳云書曰厥兆天子爵系之無佚白虎通爵篇云書無逸篇曰厥兆天子爵蓋古文尙書厥亦惟我周五字今文尙書駁異如此又引盧氏召弓校白虎通釋爲尙書亡篇逸篇愚按陳氏壽祺尙書大傳辨譌云厥兆天子爵乃尙書逸篇文誤入毋逸傳與盧說同但今古文駁異者往往而有亦未敢決其必非無逸篇文然如段說謂是厥亦惟我周五字之駁異恐未必然此五字若果出無逸篇當在文王受命惟中身厥享國五十年之下蓋謂文王受命稱王也兆者始也天子爵者王也周之之稱王自文王始故曰厥兆天子爵

## 武王惟茲四人

君奭武王惟茲四人尙迪有祿枚傳曰虢叔先死故曰四人正義曰以是文王之弟其年應長故言先死鄭疑不知誰死注云至武王時虢叔等有死者餘四人也愚按上文有五人此則四人遂謂五人中必有一死者鄭猶不斥言爲誰枚氏則以虢叔之年必老決其先死近於武斷矣儀禮喪服傳曰始封之君不臣諸父昆弟封君之子不臣諸父而臣昆弟周禮司服職賈疏引此文而曰天子之義亦當然周自文王始受命猶始封之君也武王則封君之子也封君之子不臣諸父虢叔爲文

王弟於武王則諸父也非武王所得而臣文王沒武王立號叔已在不臣之列矣故不數也文王爲始封之君不臣昆弟何以得臣號叔疑所謂昆弟者但不臣諸昆耳因昆而連言弟古書自有此例

### 天球河圖

顧命天球河圖枚傳曰球雍州所貢河圖八卦愚按雍州所貢有球琳琅玕何以獨寶此球謂之天球義不可解正義引鄭云色如天者此亦臆說也枚以河圖爲八卦不知此八卦是伏羲所手畫歟抑非也果是伏羲手畫誠可寶貴無如時代太久周時必不得有如其非也

則文王六十四卦之辭具在何取此八卦而陳之按上文越玉五重枚傳以宏璧琬琰爲二重大玉夷玉天球爲三重然周禮典瑞云琬圭以治德琰圭以易行明是二玉何得合而一之疑所謂五重者宏璧一琬二琰三大玉四夷玉五天球非玉矣廣雅釋詁球法也球與球通圖亦法也楚辭懷沙篇前圖未改王逸注曰圖法也天球河圖蓋皆古聖相傳之大法天球者天文河圖者地理也天球所以求天漢書藝文志所載黃帝五家歷三十三卷顓頊歷二十一卷如此等書當卽周時所謂天球矣中國之水莫大於河故言地理者以河爲主諸



緯書有河圖帝規萌河圖玉版河圖握矩河圖括地象  
河圖龍文河圖合古篇河圖錄運法雖出依託必有所  
本周時所謂河圖當亦近是

詩長發篇受小球大球受小其大其廣雅釋詁拱球法  
也王氏經義述聞據以說此詩愚謂小球大球卽天球  
也小其大其卽虞書九其九篇也書序云帝釐下土方  
設居方別生分類作汨作九其九篇橐籥此十一篇雖  
亡然九其九篇必九州各爲一篇方與序言下土合小  
其大其屬地小球大球屬天詩義當如此而此經天球  
河圖亦可得其義矣

大輅綴輅先輅次輅

顧命大輅在賓階面綴輅在阼階面先輅在左塾之前次輅在右塾之前枚傳曰大輅玉綴輅金先輅象次輅木正義曰木輅之上猶有革輅不以次輅爲革輅者蓋以革輅是兵戎之用於此不必陳之馬融王肅皆云不陳戎輅者兵事非常故不陳之孔意或當然也愚按以四輅爲金玉象木是也其不陳革輅之故枚旣無文馬王所說均非其義按周禮司裘云大喪廡裘飾皮車鄭注曰皮車遣車之革路是大喪非不用革輅也所以不陳者正以王之遣車以革輅爲主故車僕云掌戎路之

萃廣車之萃闕車之萃萃車之萃輕車之萃注云此五者皆兵車所謂五戎也又云大喪厥革車注云言興革車則遣車不徒戎路廣闕革輕皆有焉疏曰經不云戎路而云革車是五戎之總名故知不徒戎路廣闕革輕皆有可知若然則王喪遣車九乘除此五乘之外加以金玉象木四者則九乘矣以車僕職觀之革路雖與金玉象木同列爲王之五輅而實則又自爲廣闕萃輕四者之長謂之五戎王之遣車以此五戎爲主而金玉象木四輅從之成王之喪其革輅必與廣闕萃輕並陳於門外儀禮士喪禮下篇車各從其馬駕于門外西面而

俟是也門內所陳爲四輅門外所陳爲五戎本自各別  
經止言門內故無革輅矣

誕受美

康王之誥惟周文武誕受美若克恤西土枚傳曰言文  
武大受天道而順之能憂我西土之民正義曰美聲近  
猷故訓之爲道按馬融亦云道也見釋文則美之訓道  
古訓然也美與美通說文美篆下有古文作美可證其  
爲同字美之或體作誘詩野有死麕篇吉士誘之毛傳  
誘道也然則美美之訓道非道理之道乃道引之道禮  
記樂記篇知誘於外鄭注曰猶道也引也是其義也此

文當以誕受美爲句言皇天改大邦殷之命故我周文  
武大受天之道引猶曰天誘其衷云爾若字屬下讀若  
語詞與乃字同小爾雅曰若乃也周語引書曰必有忍  
也若能有濟也韋注曰若猶乃也是書例固有以若爲  
乃者若克恤西土乃克恤西土也自讀者以美若連文  
遂不可解宋人至援美里之文說之謬矣

又按收訓恤爲憂憂發於中心有知不知無能不能克  
恤之義不可通也恤當讀爲謚堯典惟刑之恤哉史記  
集解徐廣曰今文云惟刑之謚哉詩維天之命篇假以  
溢我襄二十七年左傳引作何以恤我說文言言部引作

諡以謚我是恤謚古聲相近而字亦相通說文謚靜語也大學曰靜而后能安故謚卽有安義廣韻五質謚靜也慎也安也若克謚西土者乃克安西土也

### 惟呂命

呂刑惟呂命王享國百年蕞荒枚傳曰言呂侯見命爲卿時穆王以享國百年蕞亂荒忽愚按經言惟呂命不言命呂侯且篇中所紀皆穆王語旣非王告呂侯亦非呂侯告王獨於篇首著此三字遂以呂刑名篇殊不可解序云呂命穆王訓夏贖刑作呂刑枚於呂命二字絕句傳云呂侯見命爲天子司寇又於訓夏贖刑下傳云

呂侯以穆王命作書夫呂命二字孤懸於上文不成義  
序言穆王訓夏贖刑而傳以爲呂侯以王命作書亦失  
其實竊謂傳義非也古人之辭有上下通稱者以上告  
下謂之命以下告上亦謂之命禮記緇衣篇引兌命鄭  
注曰兌當爲說謂殷高宗之臣傳說也作書以命高宗  
然則說命之命以臣命君非以君命臣此序呂命與說  
命同呂命穆王訓夏贖刑當於王字絕句呂命穆王者  
呂侯告穆王也史記周本紀曰甫侯言于王作修刑辟  
與書序合篇首著惟呂命三字卽序所謂呂命穆王也  
通篇雖穆王語而實皆呂侯命之故名篇曰呂刑也作

僞古文尙書者不知此義說命中篇惟說命三字正襲用惟呂命文法然是王命說非說命王失其旨矣

我皇多有之

秦誓惟截截善諷言俾君子易辭我皇多有之枚傳曰惟察察便巧善爲辨佞之言使君子回心易辭我前多有之愚按如枚義則皇當讀爲往皇往聲近義通禮記少儀篇齊齊皇皇鄭注曰皇讀如歸往之往詩信南山篇先祖是皇鄭箋曰皇之言往也又泮水篇烝烝皇皇箋曰皇皇當作晔晔晔猶往往也並其證也枚讀皇爲往往者往時也卽往者不可諫之往故傳曰我前多



有之前卽往也正義不違其旨乃增益其文曰我前大  
多有之蓋以大字釋經文皇字然則傳文前字無著矣  
阮氏校勘記反據疏以疑傳非也

祖乙圮于耿

書序祖乙圮于耿作祖乙枚傳曰夏甲子圮於相遷於  
耿河水所毀曰圮正義曰古人之言雖尙要約皆使言  
足其文令人曉解若圮於相遷居於耿經言圮於耿大  
不辭乎愚謂疏家例不肯注而此疏詆枚傳爲不辭則  
以枚義誠不可從也又引鄭云祖乙又去相居耿而國  
爲水所毀於是修德以禦之不復徙也錄此篇者善其

國圯毀改政而不徙如鄭所言稍爲文便但上有仲丁  
夏甲下有盤庚皆爲遷事作書此若毀而不遷序當改  
文見義是鄭說亦孔所不信也愚謂鄭順序文爲說自  
不可易序言圯不言遷義已見矣必何如而始謂之改  
文見義哉孔子錄祖乙一篇正善其不徙蓋殷自仲丁  
去亳遷囂實居河北正義載皇甫謐云仲丁自亳徙囂  
在河北是也自是河夏甲居相祖乙居耿皆河北也詩  
元鳥篇曰景員維河景者大也員者旋也河北三面皆  
大河旋繞之故曰景員維河說詳毛詩是殷都河北得  
形勢之勝惟河患亦頻見夏甲盤庚至遷都以避之殆

卽漢賈讓徙民當水衝者之意乎此在賈讓爲上策而  
在神禹視之實爲無策使禹當日徒執不與水爭地之  
說則洛汭以下聽其直走徐揚而已何必北行而載之  
高地哉盤庚遷殷後世美之其實渡河而南非計之得  
者也及至殷紂乃居朝歌此尙足以爲國乎祖乙圯於  
耿而不遷當必有說且或有治河之法存焉惜其書之  
亡也